

PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEDUA
PARLIMEN KEEMPAT BELAS (2019)

PERTANYAAN : LISAN

DARIPADA : PUAN RUBIAH BINTI HAJI WANG
[KOTA SAMARAHAN]

TARIKH : 10 JULAI 2019 | RABU

SOALAN

Puan Rubiah binti Haji Wang [Kota Samarahan] minta PERDANA MENTERI menyatakan :-

(a) Persiapan dan inisiatif terkini bagi memastikan urusan jemaah Malaysia mengerjakan ibadah haji berjalan lancar; dan

(b) Berapa jumlah kuota tambahan haji yang telah diberikan.

JAWAPAN : (MENTERI DI JABATAN PERDANA MENTERI)

Tuan Yang Di-Pertua,

- a) Untuk makluman Ahli Yang Berhormat, persiapan untuk menghadapi musim haji tahun ini telah berjalan dengan lancar dan mengikut perancangan yang disusun. Lembaga Tabung Haji (**TH**) telah menyediakan pelbagai perkhidmatan bagi bakal haji Malaysia untuk menunaikan haji dengan selamat dan selesa termasuk penerbangan cater, bangunan penginapan di Makkah dan Madinah, sajian makanan harian dan pengangkutan semasa di Tanah Suci serta kemudahan-kemudahan di perkhemahan Arafah dan Mina.

Antara penambahbaikan terkini bagi kemudahan dan kebajikan jemaah haji Malaysia untuk tahun ini adalah:-

1. Urusan *pre clearance* jemaah haji Malaysia yang telah dimulakan pada Musim Haji 1439H diteruskan pada tahun ini kerana terbukti mampu memendekkan proses imigresen semasa ketibaan di lapangan terbang Arab Saudi bagi jemaah haji yang menaiki penerbangan cater.
2. Makanan *ready to eat meals* untuk jemaah haji semasa Masya'ir akan dipertingkatkan mutu sajian untuk memastikan kebersihan dan keselamatan semasa penyediaan makanan.
3. Penambaihan penyediaan alat penyaman udara (*air conditioner*) di semua khemah jemaah haji Malaysia di Arafah.

- b) Untuk makluman Ahli Yang Berhormat juga, kuota Malaysia untuk musim haji tahun ini adalah sebanyak 40,200 orang termasuk 10,000 kouta tambahan yang telah diluluskan oleh Kerajaan Arab Saudi.

Sekian. Terima kasih.